

Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line Kalaallit Nunaannut avammullu assartuinissamut sullissinissamik akuersissutaata atuukkunnaarsinneqassappat pitsaaqutissai ajoqutissaalu, taamatuttaarlu assartuinnermut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingunissai qanoq isikkoqarnersut. Misissuineq Inatsisartunut UKA 2023 nallertinnagu tunniunneqassaaq. (Inatsisartunut ilaasortaq Jens-Frederik Nielsen, Demokraatit)

Akissuteqaat

(Ineqarnermut Attaveqaasersuutinullu Naalakkersuisoq)

Siullermeerneqarnera

Aallarniutigalugu periarfissaq manna iluatsillugu aalajangiiffigisassatut siunnersuummut matumunnga, inuiaqatigiisugut pilersorneqarnitsinnut annertuumik soqutiginninnermik ersersitsisumut qujavunga. Qanga periutsit attatiinnerneqarnissaannut pituttorsimanginnissatsinnik siunnersuuteqartup isumaanut Naalakkersuisut isumaqataapput.

Siunnersuutigineqartutut misissuinissaq, ajornartorsiutaasup assigiinngisitaarnerusumik isiginiarneqarnissaanut Inatsisartunut periarfissiissaaq. Taamaalilluni nunatsinni pissutsinut naleqqussakkamik politikikkut aaqqiissutissarsiorsinnaalissaagut.

Taamaakkaluartoq nalorninartut ataasiakkaat eqqaaneqartariaqarput.

Misissuivinnissaq ukiumik ataatsimik sivilissuseqassasoq naatsorsuutigineqartariaqarpoq. Taamaattumik misissuinissamut piareersarluarnissamut, soqutigisaqatigiinnillu attuumassuteqartunik akuutitsinissamut piffissaliilluartoqartariaqarpoq. Tamatuma saniatigut assigiimmik akeqartitsilluni nunaqarfinnut assartuineq ilaatinneqarluni, imaatigut assartuinnermut Royal Arctic Linep akuersissuteqarnera aamma eqqarsaatigineqartariaqarpoq.

Manna iluatsillugu oqaatigerusuppara, innuttaasut nunaqarfinniiginnarnissaannut akimmiffinngorlutik allannguinissat Naalakkersuisut peqataaffigisinnaanngimmatigit. Tamanna patsisaalluni nunaqarfinnut nassiussanik assartuisarnerup attatiinnerneqarnissaa misissuinissami pingartinneqassaaq.

Imaatigut assartuineq inuiaqatigiinni aalajangiisuuvoq, taamaattumillu imaatigut assartuinnermut tunngasunik aalajangiitinnata eqqarsarluartariaqarluta. Royal Arctic Linep akuersissutaa atorunnaarsinneqassappat iluaqutissat, ajoqutissallu misissorneqarnissaannik

siunnersuummut matumunnga tunngatillugu eqqarsarluartariaqartugut Naalakkersuisut isumaqarput.

Taamaattumik Naalakkersuisut siunnersuut taperserpaat, misissuinissalli aallartinneqarnissaa sioqqullugu piareersartariaqarneq patsisaalluni siunnersuutigaarput, piffissaliussaq 2023-mi Ukiakkut ataatsimiinnermit 2024-mi Upernaakkut ataatsimiinnermut nuunneqassasoq.

Tamanna tunuliaqutaralugu tulliuuttoq allanguutissatut siunnersuutigineqarpoq:

”Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line Kalaallit Nunaannut avammullu assartuinissamut sullissinissamik akuersissutaata atuukkunnaarsinneqassappat pitsaaqutissai ajoqqutissaalu, taamatuttaarlu assartuinnermut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingunissai qanoq isikkoqarnersut. Misissuineq Inatsisartunut UPA 2024 nallertinnagu tunniunneqassaaq.”